

四庫全書

子部

欽定四庫全書

子部

佛祖歷代通載卷二十一

詳校官給事中臣鄧文泮

檢討臣何思鈞覆勘

總校官檢討臣何思鈞

校對官學正臣李巖

謄錄監生臣蔣繼煥

欽定四庫全書

佛祖歷代通載卷二十一 元 釋念常 撰

大元

乙丑太祖應天啓運聖武皇帝是年征西夏明年大會
於斡難河建九游之白旗共上尊號曰青吉思皇帝
都和林觀夫聖人出世威靈氣焰自天佑之膺命立
極超今邁古且以鳳凰在殼渥洼墮地猶自絕類離
倫矧我太祖皇帝處九五飛龍之位乎其丕祚鴻休

與天地相為終始也

丙寅西夏拓跋實都爾古乾順小子仁友之子乃仁宗姪也是年五月立在位六年

丁卯宋吳曦僭位於蜀凡三十八日而安丙誅之

戊辰宋改嘉定 瑞像計二千二百年矣

己巳金國東海侯立改年大安名允濟世宗第七子章宗無嗣羣臣奉遺詔立之後為赫舍哩執中所弑在位四年

庚午旃檀瑞像至金國十二年十月迎赴上京禁庭供養
罷試經科

辛未大蒙古國號始建

西夏神宗拓跋舒巴勒立改年光定夏人因大
兵以金人不救恨之遂叛

壬申金改重慶 大兵至燕京

癸酉安南主李龍翰卒子晃旦立其國後為江南陳日
照所有而傳其子威晃

金國宣宗名珣章宗庶兄執中弑東海王而迎立之以東海至寧元年九月即位改年貞祐在位十二年八月大兵攻燕京

嘉定六年十二月八日天竺北峯講師入寂名宗印字元實生鹽官陳氏年十五具戒謁竹菴觀公明教觀之旨凡諸祖格言必誦滿千遍資教空延居座首嘗著宗極論事理各立一性之旨印設九難宗極為之義負通守蘇珎觀不二門以文雖簡而昧其說印撮示機要珎

即領解白師座請居正覺颶風飄蕩僅存藏殿印守死
不去風為之止未久玘亦召還要印偕行曰盍西還相
與弘贊居東二十七年至是復反浙右貳上竺講止觀
深砭學者支離名相之病圍座挾策主者以得士為忌
去隱雷峯毛氏庵問道者皆至杜氏建普光一區具禮
迎之禪講並行法道益盛適德藏來請印曰肄業之地
思報久矣歷遷超果圓通北禪道德之譽既行土木之
績亦就海空英辭靈山舉以自代詔可學徒五百咸服

其道宿弊為之一革寧宗聞名召對便殿上說錫號惠
行法師以營觀室行化吳中至松江謂其徒曰吾化緣
畢此乃右脇而化

甲戌金於四月遷汴求與大國和親 錦帥張智以郡
降尋叛自號遼西王改年大安討平之 克燕京

乙亥世祖生於八月 大兵破潼關

丙子二月日蝕 川東西地震 黎州山崩

丁丑金改興定七月日食金兵犯光州李珣等禦之

戊寅漣水弓手李全自北歸即李鐵鎗也詔以為京東路總管

庚辰禪宗聯燈錄成

辛巳金國五月日食

壬午大兵自回鶻征西夏

癸未西夏拓跋德仁是年九月立改年乾定

金國改元光九月日食 宋行經界田糧

乙酉宋理宗昀立改寶慶元年初名與莒榮王希臘之

子太祖十世孫也寧宗子多而不育鞠宗室子詢立
為太子薨初皇從弟沂靖惠王柄無子嘗以宗室子
賜名貴和為之後及失太子詢遂立貴和為皇子賜
名竑封濟國公竑惠而輕嘗疾史彌遠專權謂異日
不可容彌遠聞而惡之故陰為之計與莒幼不好弄
羣兒聚嬉輒獨登高坐不動長上指以語兒曰汝曹
不効此人恰一大王相似羣兒每羅拜其下遂有趙
大王之號彌遠物色得之嘗取應得舉矣特旨補官

竑既為寧宗子遂以與莒為沂王後賜名貴誠除邵
州防禦使寧宗大漸乃白中宮以貴誠為皇子改名
昀宣遺詔即位進竑為濟陽郡王出判寧國府恭聖
楊后聽政事定然後徹簾壽六十一

金國改正大名守緒宣宗第三子性寬仁和嗜書
博學是年立至癸巳年歸德府絕糧六月奔蔡
八月南北兵夾攻甲午正月禪位於後主麟閉
閣自經國亡

丙戌西夏拓跋德仁七月卒次清平郡王立
在位一年
丁亥太祖以丙戌春至西夏一歲盡克其城
是年十月
二十七滅夏上年六十矣西夏凡一十二主
始繼遷
以太平興國壬午起兵夏臺訖今寶慶丁亥
國滅共
二百四十六年元昊於景祐甲戌自剏偽
朔僭帝號
者一百九十四年

戊子宋改紹定元年

辛卯太宗皇帝即位

壬辰太祖次四子統王師破汴金主遷蔡金臣崔立降
天朝遣使過宋議夾攻金

癸巳金改天興

甲午宋改端平元年 滅金右金九主一百二十三年
乙未抄數中原戶計 宋天狗星墜淮安軍金棠縣其
聲如雷三州之人皆聞之及觀則為紅色碎石或以
為兵戈之兆 詔集議出度牒收四介會子

丙申分封諸王上親總兵征回回國歸附 宋失四川

丁酉宋改嘉熙

己亥詔諭高麗 宋十月虹見

庚子宋京師地震白氣亘天旱蝗江浙福建旱都城大
荒饑者奪食於路市中殺人以賣日未晡路無行者

辛丑二月三日大赦天下 宋改淳祐

丙午定宗皇帝即位

庚戌天朝滅遼東高麗

辛亥憲宗皇帝即位

世尊示滅二千二百年矣

癸丑宋改寶祐元年 大兵伐川蜀

丙辰抄數遼東戶計 宋撥官誥度牒收換楮幣燬之

丁巳有元慶壽海雲大士遷化名印簡山西之嵐谷寧

遠人俗宋氏微子之後父慈善信服鄉里里人稱為虛

靜先生母金源王氏祖世奉佛不仕師生於金之泰和

壬戌十二月望人品恢偉童幼神悟七歲親授以孝經

開宗明義章乃曰開者何宗明者何義親驚異知非塵

勞中人攜見傳戒顏公顏欲觀其根氣授以草庵歌至
壞與不壞主元在師問曰主在何處顏曰何主也師曰
離壞不壞者曰此客也師曰主鬻顏吟吟而已乃得禮
中觀沼公為師八歲受三歸五八十善戒法師方十一
蒙豫王恩賜納具有洪彥上座問師曰子今受大戒了
緣何作小僧師曰緣僧小故戒說大也試問上座戒老
耶小耶曰我身則老語未終師大聲曰休生分別一日
上座教僧去師背上拍一下待回首乃豎指示之僧如

教拍師背師便豎一指僧回舉似上座座奇之師年十二中觀聽師叅問誨之曰汝所欲者文字語言耳向去皆止之唯身心若枯木死灰今時及盡功用純熟悟解真實大死一場休有餘氣到那時節瞥然自肯方與吾相見師受教習定一日扶中觀行觀曰法燈禪師道看他家事忙且道承誰力汝作麼生會師將中觀手一掣觀曰這野狐精師曰喏喏觀曰更須別叅師年十三時成吉思皇帝征伐天下師在寧遠於城陷之際稠人中

親面聖顏俾師歛髻師告曰若從國儀則失僧相也蒙
旨如故自此僧有不同俗民之異也師年十八天兵再
下太師國王領兵取嵐城四衆逃難解散師侍中觀如
故觀曰吾迫桑榆女方富有春秋今此玉石俱焚子宜
逃生去師泣曰因果無差死生有命安可離師而求脫
免乎縱或得脫亦非仁子之心也老人察師誠確囑師
曰子向去朔漠有大因緣吾與子俱北渡矣明日城降
有清樂元帥史公天澤義州元帥李公七哥者見師罷

宇非常問曰爾是何人師曰我沙門也史曰食肉否師曰何肉史曰人肉師曰人非獸也虎豹尚不相食況人乎史曰今日兵刃之下爾亦能不傷乎師曰必仗其外護者公喜甚李師問曰爾既為僧禪耶教耶師曰禪教乃僧之羽翼也如國之用人必須文武兼濟李曰然則必也從何而住師曰二俱不住李曰爾何人也師曰佛師復曰吾親教中觀亦在於此二公見師年幼無所畏懼應對不凡即與往見中觀二公聞中觀教誨諄諄乃

大喜曰果然有是父有是子也於是禮中觀為師與師
結為金石友國王將中觀及師分撥直隸成吉思皇帝
載中觀于黃犢輕車師親執御日營採汲經年至赤城
舍於郎中張公宅使臣托蘇布哈并瑪勒傳青吉斯皇
帝聖旨道與穆呼哩國王你使人來說底老長老小長
老實是告天的人好與衣糧養活者教做頭兒多收拾
那般人在意告天不揀阿誰休欺負交達爾罕行者是
時國王奉詔大加恩賜延居興安香泉院國王署中觀

慈雲正覺大禪師師寂照英悟大師所需皆官給小長老之名自此始十九中觀將示寂有羽客楊至慎求頌老人俾執筆代書偈曰七十三年如掣電臨行為君通一線泥牛飛過海東來天上人間尋不見客曰師幾時行老人曰三日後時五月廿七日也至六月初一果無疾而寂師哀毀過禮闋維收頂骨舍利供養建塔於府之西北隅師罄所有為設齋唯乞食看塔一夜聞空中有聲召師名師暫然有省乃遷入三峯道院復聞人告

曰大事將成行矣母滯此黎明策杖之燕過松鋪值雨宿於岩下因擊火大悟自捫面曰今日始知眉橫鼻直信道天下老和尚不寐語明日至景州見本無玄和尚問從何所來師曰雲收幽谷曰何處去師曰月照長松玄點首曰孟八郎便恁麼去也師諾諾趨出過洵州遇宿儒張子真問上人何不安住師曰河裏無魚市上取先是中觀臨終時師問中觀曰某甲當依何人了此大事觀囑曰賀八十去師既入燕至大慶壽寺乃省前識

於是徑謁中和老人璋公中和先一夕夢一異僧策杖
徑趨方丈踞師子座既明謂知客曰今日但有客過當
令來見老僧及晚師至引見中和笑曰此衲子乃夜來
所夢者師便問曰某甲不來而來作麼生相見壽曰叅
須實叅悟須實悟莫打野裡師曰某甲因擊火迸散乃
知眉橫鼻直壽曰吾此處別師曰如何表信壽曰牙是
一口骨耳是兩邊皮師曰將謂別有壽曰錯師喝曰草
賊大敗壽辭去次日壽舉臨濟兩堂首座齊下喝僧問

濟還有賓主也無濟曰賓主歷然汝作麼生會師曰打破秦時鏡磨尖上古錐龍飛霄漢外何勞更下槌壽曰汝只得其機不得其用師便掀禪床壽曰路途之樂終未到家師與一掌曰精靈千載野狐魅看破如今不直錢壽打一拂子曰汝只得其用不得其體師進前曰青山聳寒色月照一溪雲壽曰汝只得其體不得其智師曰流水自西東落花無向背壽曰汝雖善語言三昧要且沒交涉師豎起拳復拍一拍當時丈室震動壽曰如

是如是師拂袖便出明日命師掌書記自此中和復以
向上鉗槌差別關鍵種種辯驗師以無礙辯才應荅皆
契其悟解精明度越前輩壽一日謂師曰汝今已到大
安樂之地宜善護持吾有如來正法眼藏祖師涅槃妙
心密付於汝毋令湮沒師掩耳而出即以衣頌授師頌
曰天地同根無異殊家山何處不逢渠吾今付與空王
印萬法光輝總一如出世住興州仁智歷遷梁陽之興
國興安永慶以至大慶壽寺皆太師國王及諸重臣之

命師於室中以四無依語勸學者語具本傳辛卯十一月受大元皇帝宣賜師稱心自在行一日於廊下逢數僧師問第一僧曰那裏去僧云賞花去師便打問第二僧那裏去云禮佛去師亦打問第三僧那裏去云那裏去師亦打問第四僧那裏去僧無語師亦打問第五僧那裏去僧云覓和尚去師云覓他怎麼僧云待打與一頓師云將什麼來打僧云不持棒來打師連打四下云這掠虛漢衆皆走師召云諸上座衆回首師云是什麼

乙未朝廷差扎呼岱侍讀選試經僧道萬松長老嘆曰
自國朝革命以來沙門久廢講席看讀殊少乃同禪教
諸老宿請師董其事師從容對曰諸師當以斯激勵衆
僧習應試經典主上必有深意我觀今日沙門少護戒
律學不盡禮身遠於道故天龍亡衛而感朝廷勵其考
試也三寶加被必不辜聖詔遂與華使相見之後其處
置法度悉從師議舍哩丞相以忽都護大官人言問師
曰今奉聖旨差官試經識字者可為僧不識字者悉令

歸俗師曰山僧不曾看經一字不識丞相曰既不識字如何做長老師曰方今大官人還識字也無於時外鎮諸侯皆在聞師之言皆大驚異丞相復曰必竟如何師曰若人了知此事通明佛法應知世法即是佛法道情豈異人情古之人亦有起於負販者立大功名於世載於史冊千載之下凜然生氣況今聖明天子在上如日月之照臨考試僧道如經童之舉豈可以賢良方正同科國家宜以興修萬善敬奉三寶以奉上天永延國祚

可也我等沙門之用舍何足道哉丞相以是言告於大
官人乃從而奏聞由是雖考試亦無退落者蒙聖旨悉
依太祖皇帝存濟聽僧如故丙申有司欲印識人臂師
力白於呼圖克大官人曰人非馬也既皆歸服國朝天
下之大四海之廣縱復逃散亦何所歸豈可同畜獸而
印識哉由是印臂之法遂止初孔聖之後襲封衍聖公
元措者渡河復曲阜廟林之祀時公持東平嚴公書謁
師師以襲封事為言於大官人師為其言曰孔子善稽

古典以大中至正之道三綱五常之禮性命禍福之原
君臣父子夫婦之道治國齊家平天下正心誠意之本
自孔子至此襲封衍聖公凡五十一代凡有國者使之
襲承祀事未嘗有缺大官聞是言乃大敬信於是從師
所言命復襲其爵以繼其祀事師復以顏孟相傳孔子
之道令其子孫不絕及習周孔儒業者為言亦皆獲免
其差役之賦使之服勤其教為國家之用三十六年丁酉
正月太祖皇帝二皇后以光天鎮國大士號奉師己亥

冬師再起復主大慶壽寺壬寅呼必賚大王請師赴帳
下問佛法大意師初示以人天因果之教次以種種法
要開其心地王生信心求授菩提心戒時秉忠書記為
侍郎劉太保也復問佛法中有安天下之法否師曰包
含法界子育四生其事大備於佛法境中此四大洲如
大地中一微塵許况一四海乎若論社稷安危在生民
之休戚休戚安危皆在乎政亦在乎天在天在人皆不
離心而人不知天之與人是其問別法於何行故分其

天也人也我釋迦氏之法於廟堂之論在王法正論品
理固昭然非難非易惟恐王不能盡行也又宜求天下
大賢碩儒問以古今治亂興亡之事當有所聞也王又
問三教何教為尊何法最勝何人為上師曰諸聖之中
吾佛最勝諸法之中佛法最真居人之中唯僧無詐故
三教中佛教居其上古來之式也由是太后遵祖皇聖
旨僧居上首仙人不得在僧之前王以珠襖金錦無縫
天衣奉以師禮王固留師師固辭將別王問佛法比去

如何受持師曰信心難生善心難發今已發生務要護持專一不忘元受菩提心戒不見三寶有過恒念百姓不安善撫綏明賞罰執政無私任賢納諫一切時中常行方便皆佛法也師既辭行有一惡少年肆言訛謗以佛法不足信王聞之乃召其人訓以大人之言復以刑法罪之專使白師師回啓曰明鏡當臺妍醜自現神鋒在掌賞罰無私若以正念現前邪見外魔殺之可矣然王者當以仁慈存心乃可王益敬焉甲辰呼必賚大王

以珠笠奉師乙巳奉六皇后旨於五臺為國祈福丙午
奉六皇后詔師起至中途值風疾作回奏得旨還燕丁
未庫覓皇帝即位頒詔命師統僧賜白金萬兩師於昊
天寺建大會為國祈福太子哈喇齊請師入和林延居
太平興國禪寺尊師之禮非常辛亥孟克皇帝即位頒
降恩詔顧遇優渥命師復領天下僧事蠲免差役悉依
舊制丙辰正月奉聖旨建會於昊天寺初二日於會中
忽患風恙半身不舉至夏初稍愈是月永和爾大王差

蒙古萬宣差以金拄杖金縷袈裟段并令旨奉師求法
語七月師會諸勤舊抄所長物見數令主後事丁巳夏
說偈畢師云汝等少誼吾欲偃息侍僧急呼主事人至
師吉祥泊然而逝矣即後四月初四日也世壽五十有
六茶毘獲舍利無算欽承呼必賚大王令旨建塔
於大慶壽寺之側謚佛日圓明大師望臨濟為十
六世

戊午詔釋道辯析化胡經 上大駕南征

己未九月大兵自潯黃州渡江征宋歲貢而退

上崩
於釣

魚山 宋改開慶元年

庚申大元世祖聖德神功文武皇帝即位尊臨寶宸統
御寰區四海混同萬邦入貢建立制度條理紀綱為
子孫萬世成法寬仁愛人深信因果不言自信不化
自行聖君之德蕩蕩乎民無能名焉

宋改景定元年 天朝遣郝經通好 五月十九建
元中統廿七日大赦普度僧尼

辛酉行中統鈔法平章王以道奏

癸亥制開平府號上都 宋買公田始自浙

甲子至元元年城燕建都八月十六改元大赦天下設
會度僧詔請

國師班迪達帕克期巴登座授祕密戒 是年八月拜光
祿大夫太保叅領中書省事制

長生天氣力裏皇帝聖旨咨爾劉秉忠氣剛以直學富
而文雖晦迹於空門每潛心於聖道朕居藩邸卿實賓

僚側聞高誼餘二十年出從遐方幾數萬里迨予嗣服
須汝計安不先正名何以壓衆宜崇師位兼總政機可
特授光祿大夫太保叅領中書省事卿其勉輔朕躬率
先乃屬察朝夕之勤惰審議論之是非凡有施為並聽
裁決佇看成績別示寵章准此中統五年八月日

乙丑宋改咸淳元年度宗即位初名孟啓榮王與芮之
子理宗之猶子也理宗子多而不育鞠孟啓於宮中
改名孜又改名襟立為皇子封忠王已而建儲改名

璿

丙寅大教東被已一千二百年矣

戊辰大兵圍襄陽時呂文煥告急宋遣高連范文虎赴

援大兵於要害處連珠劄寨不得通 宋十月日食

己巳帝師帕克斯巴制蒙古字成二月頒行天下

宋之常
州雞翼

生
距

庚午立尚書六部 宋大旱 至元七年詔請丹巴金

剛上師住持仁王寺普度僧員

大元帝師苾芻帕克斯巴說根本有部出家授近圓羯磨儀軌親制序文曰原夫瞻部嘉運至四佛釋迦文如來遺教利見也大元御世第五主憲天述道仁文義武太光孝皇帝登極也天資福惠諦信內乘普使萬邦咸歸一化雖敷天垂拱而至治無垠眷支那弘道而在躬不息欲以自佛相承師資繼踵迄今不替正戒儀軌為拳拳從善之行人俾一一恒持於淨戒精練三業堅守四儀此實聖皇匡正佛法之睿旨也昔因善逝與人天衆

普說聲聞上教一切有部別解脫經依此採拾未得令
得律儀方便羯磨儀軌此乃聖光德師之總集也始從
大竺次屆西番爰有洞達五明法王大士薩斯嘉班迪
達名稱普聞上足苾芻帕克斯巴乃吾門法主大元帝師
道德恢隆行位叵測授茲儀軌衍布中原令通解三藏
比丘住思觀演說正本翻譯人善三國聲明辯材無礙
含伊畢國翰林承旨彈壓孫傳華文譯主生緣北庭都
護府解二種音法辭通辯諸路釋門總統哈達薩哩都

通暨翰林學士安藏總以諸國言詮奉詔譯成儀式序
本帝師親製繪為華迹以編陳始末粗彰聊記歲月時
庚午至元七年冬至後二日序

辛未大元國號十一月始建興蒙古學校宋大饑
癸酉詔諭呂文煥二月大兵破樊城呂文煥以襄陽
降

甲戌勅命巴延丞相伐宋三月宋主崩太子立四歲
是年八月故光祿大夫太保贈太傅儀同三司文貞鑒

公薨翰林學士嘉議大夫知制誥兼修國史王磐奉勅
謚神道碑銘并序其文曰耕莘非求進之地而伊尹阿
衡釣渭非巧宦之途而太公同載漢張良志從赤松而高
祖得之以輔成帝業唐李泌幼好仙術而肅宗用之以
佐定中興蓋天下之士惟自重者可與有為而輕進者
必非令器是以古之明王取士不以悅媚易親者為可
佳而以閒遠高潔難致者為可貴聖天子之用太保劉
公其審是道歟公以高潔之資慕空寂之教輕富貴如

浮雲等功名於夢幻曷曾有一毫榮利之念動於心乎
聖天子邂逅一見即挽而留之待以腹心契如魚水深
謀密畫雖者宿貴近不得預聞者悉與公叅決焉此其
精誠胥會志意交孚與夫渭濱之同載商邑之阿衡蓋
異世而同符矣公諱秉忠字仲晦瑞州劉李村人先世
仕遼多顯貴金初曾大父嘗任邢州節度副使秩滿身
還鄉里留其家於邢故自公大父以下遂為邢人焉大
父諱澤資性倜儻為鄉閭所重父諱潤仕本朝歷邢州

錄事鉅鹿內丘兩縣提領俱有惠愛公風骨秀異志氣
英爽不羈家貧年十七為邢臺節度使府令史以養其
親幹敏精潔諸老吏咸服其能一日因按讀事有不愜
意投筆歎曰吾家奕世衣冠今吾乃汨沒為刀筆吏乎
丈夫不得志於世間當求出世間事耳即棄去隱於武
安山岩谷間草衣木食以求其志天寧寺虛靜禪師聞
之遣其徒招致與披剃為僧仍以公知經書工翰墨命
掌書記後遊雲中住南堂寺值海雲禪師被召北觀過

雲中聞公博學多藝能求相見既見約公俱行公不可
海雲固要之不得已遂行既至謁今上於潛邸一見應
對稱旨自是屢承顧問及海雲南還公懇求奔喪上賜
黃金百兩仍遣使送至邢州公持服營葬事起墳於賈
村葬其祖父母父母服闋被召復還和林公獻書陳時
事所宜者數十條凡萬餘言率皆尊主庇民之事上嘉
納之甲寅歲從上征雲南己未歲從上伐宋揚灘渡濟
江圍鄂州上神武英斷每臨戰陣前無堅敵而中心仁

愛公嘗讚之以天地好生為德佛氏以慈悲濟物為心
方便救護所全活者不可勝計庚申歲春上正位宸極
創定朝儀立官制改元建號一切所當施設時物之宜
皆公所草定中統五年秋八月改至元元年翰林學士
承旨王鶚奏言書記劉秉忠效忠藩邸積有歲年叅帷
幄之密謀定社稷之大計忠勤勞績宜被褒榮今聖明
寓極萬物維新秉忠猶以野服散號蕭條間寂守其初
心深所未安宜與正其衣冠崇以顯秩實遂衆望上覽

奏欣然嘉納即日命有司備禮冊授公先祿大夫位太保叅領中書省事選聘侍講學士竇默次女為夫人賜第於奉先坊給少府宮籍監人戶甚衆公齋居蔬食終日澹然與平昔畧不少異至元十一年扈從至上都居南屏山之精舍秋八月壬戌之夜儼然端坐無疾而薨享年五十有九訃聞上嗟悼不已謂羣臣曰秉忠三十餘年小心慎密不避艱危事有可否言無隱情又其陰陽術數之精占事知來若合符契惟朕知之他人莫得

預聞也遣禮部侍郎趙秉溫護其喪還大都以冬十月
壬申葬欽營葬一切所須皆出內帑十二年春正月詔
贈太傅儀同三司下太常議諡曰文貞仍命翰林學士
王磐撰碑文字臣磐欽惟國家列聖相承咸以武功戡
定禍亂龍韜豹畧鷹揚虎視豐功偉績之臣其當紀名
汗簡畫像凌烟者不為不多若夫輔佐聖天子開文明
之治立太平之基光守成之業者實惟太傅劉公為稱
首聖天子方在潛邸士之所以涉遠道冒風霜而至者

往往有所陳訴祈請干慕進用惟公獨無所求間燕之
際每承顧問輒推薦南州人物可備器使者宜見錄用
由是弓旌之所招蒲輪之所迓耆儒碩德奇材異能之
士茅拔茹連致無虛月逮今三十年間揚歷朝省班布
郡縣贊維新之化成治安之功者皆公平昔推薦之餘
也其識度之宏遠推此一節而論亦可見其髣髴矣又
自幼好學至老不衰通曉音律精算數善推步仰觀占
候六壬遁甲易經象數邵氏皇極之書靡不周知初丁

太夫人憂毀瘠骨立衣一弊綿裘三歲不易及錄事公卒雖身從天竺之教而服食貶損容貌哀戚與循禮典而執通喪者蓋無少異也晚娶無子以猶子蘭璋為嗣弟秉恕今為順天路總管臣磐謹按中書左丞張文謙所作行狀次第其行事之實而系以銘辭銘曰大元五葉聖運隆昌爰有異人出佐時康不坐官府不趨朝行褐衣蔬食禪寂徜徉謀謨帷幄罄竭忠良指陳成敗開闔陰陽淵慮婉畫鬼神莫量扶日上天照臨萬方萬方

仰德百靈効祥庭陳玉帛路走梯航朝儀整肅濟濟蹌蹌羣賢來集庶政允咸大綱一舉衆目斯張治定功成聖眷彌彰崇資峻秩師表侯王肇造皇家元勲是當良平佐漢房杜興唐公不自多愈隆謙光見善必舉有能必揚陸行滯阻與為橋梁川泛艱厄與為帆槳寒而求衣煥之裘裳饑而求食飫之腴肪門庭桃李爛熳芬芳人感公德銘刻肝腸公施於人過即遺忘公之仁賢宜享遐年胡為一朝蟬蛻而仙燕都南原盧溝北暎佳城

蔚蔚有墳歸然地固重泉松柏叅天石爛松枯芳名永傳

贈儀同三司太傅諡文貞制

長生天氣力裏大福廕護助裏皇帝聖旨臣以忠孝而
事上貴輸獻納之誠上以禮義而遇臣思篤始終之愛視
死之日猶生之年故光祿大夫太保劉秉忠學窺天人
識貫古今遂冲而有守安靜而無華昔侍潛藩稔聞高
論適當三接之際懇上萬言之書蓋將舉天下而措諸

安以戒為人主者過於殺朕嗣服而伊始卿盡力以居多蓋得卿實契於朕心而獨朕悉知於卿意事皆有驗人匪他求周旋三十年不避其難剴切數百奏各中其理共成庶政方圖任於舊人誰謂旻天不憖遺於一老興言及此何日忘之載惟臺輔之尊厥有泉局之責是用錫之綸命峻一品之華階祿以衮衣躡三槐之正位復加顯號允荅殊勲惟爾英靈識予哀寵可贈儀同三司太傅諡文貞准此至元十二年正月 日

乙亥至元十二年詔諭兩淮州縣新附

宋改德祐幼主熈立度宗子母全后謝太皇后臨朝

六月朔宋日食之既

丙子大元天兵臨境舉國歸附

正月十八日幼主謝太皇后全后朝京封幼主

瀛國公全后為尼於正智寺先是陳宜中張世傑奉益王衛王如永嘉與蘇劉義遇共圖興復五月益王即位於福州改景炎十一月王世強引兵逼三山宜中奉二王南行十二月至廣州

詔安歸

附軍民 九月十一日大赦

右宋前後共十六主凡三百十七年而亡

丁丑十二月大兵逼廣州宜中奉二王抵肇慶府

勅令瀛國公往多斯瑪路習學梵書西番字經 建大

聖萬安寺

戊寅十五年正月旦設會齋僧大赦玉泉等五老蒙恩

得度三月

宜中奉益王由海道復入廣四月望日崩十七日衛王即位於硃州改祥興六月世

傑奉衛王

次年正月大兵攻厓山八月

至厓山

月宜中入占城至落鵝國

庚辰十七年二月宜中

奉衛王自落鵝經占城回四月復入厓山張世傑死未幾二廣

皆歸一統六月新歷成賜名授時明年始頒行天下

大元帝師帕克思巴是年示寂翰林學士王磐等奉敕述
行狀曰皇天之下一人之上開教宣文輔治大聖至德
普覺真智佑國如意大寶法王西天佛子大元帝師班
迦達帕克思巴帝師乃土番國人也生時諸種瑞應具詳
家譜初土番有國師禪怛囉策喇具大威神累葉相傳
其國王世師尊之凡十七代而至薩斯嘉幹即師之伯
父也迺禮伯父為師祕密伽陀一二千言過目成誦七
歲演法辯博縱橫猶不自足復遍咨名宿鉤玄索隱盡

通三歲癸丑師年十五世祖皇帝龍德淵潛師知真命
有歸馳駟徑詣王府世祖宮闈東宮皆秉受戒法特加
尊禮戊午師二十歲釋道訂正化胡經憲宗皇帝詔師
剖析是非道不能答自棄其學上大悅庚申師年二十
二歲世祖皇帝登極建元中統尊為國師授以玉印任
中原僧揔統天下教門辭帝西歸未暮月召還庚午師
年三十二歲時至元七年詔制大元國字師獨運摹畫
夜成稱旨即頒行朝省郡縣遵用迄為一代典章升號

帝師大寶法王更賜王印統領諸國釋教旋又西歸甲戌師年三十六歲時至元十一年皇上專使召之歲杪抵京王公宰輔士庶離城一舍結大香壇設大淨供香花幢蓋大樂仙音羅拜迎之所經衢陌皆結五綵翼其兩傍萬衆瞻禮若一佛出世時則天兵飛渡長江竟成一統雖主聖臣賢所致亦師陰相之力也為珍哉皇太子說器世界等彰所知論尋又力辭西歸皇上堅留之不可庚辰師年四十二歲時至元十七年十一月二十

二日示寂上聞不勝震悼追懷舊德連建大宰堵波于
京師寶藏真身舍利輪奐金碧無儔

辛巳至元十八年十月二十日僧道二家辯析特奉
聖旨長生天氣力裏大福廕護助裏皇帝聖旨道與中
書省樞密院御史臺隨路宣慰司按察司達魯噶齊管
民官管軍站人匠等官並衆先生每在前孟克皇帝聖
旨裏戊午年和上先生每折證佛法先生每輸底上頭
教十七箇先生剃頭做了和尚將先生每說謊做來的

化胡等經並印板教燒燬了者隨路觀院裏畫着的石碑鐫着底八十一化圖盡行燒燬了者麼道如今都功德使司奏隨路先生每將合毀的經文印板至今藏着却不曾毀了更保定真定太原平陽河中府王祖師庵頭關西等處有道藏經板這般奏的上頭教張平章張左丞焦尚書泉總統呼圖克伊蘓翰林院衆學士中書省客省使圖魯省宣使舒蘓丁淵僧錄真藏僧判衆講主長老等張天師祈真人李真人杜真人衆先生每一同

於長春宮內分揀去來如今張平章等衆人回奏這先生家藏經除道德經是老子真實經旨其餘皆後人造作演說多有詆毀釋教偷竊佛語更有收入陰陽醫藥諸子等書往往改易名號傳註訛舛失其本真偽造符咒妄言佩之令人商賈倍利夫妻和合有如鴛鴦子嗣蕃息男壽女貞誑惑萬民非止一端意欲貪圖財利誘說妻女其有教人非望佩符在臂男為君相女為后妃入水不溺入火不焚刀劍不能傷害等語及今張天師

祁真人李真人杜真人試之於火皆求哀請命自稱偽妄不敢試驗今擬得除老子道德經外隨路但有道儀說謊經文並印板盡宜焚去又據祁真人李真人杜真人等奏告據道藏經內除老子道德經外但係後人捏合不實文字情願盡行燒毀了俺也乾淨准奏今後先生每依着老子道德經裏行者如有愛佛經的做和尚去者若不願為僧娶妻為民者除道德經外說謊做來的道藏經文並印板盡行燒毀了者今差諸路釋教泉

總統中書省客省使圖魯前去聖旨到日不以是何官
更先生道姑秀才軍民人匠鷹房打捕諸色人等應有
收藏道家一切經文本處達魯噶齊管民官添氣力用
心拘刷見數分曉分付差去官眼同焚毀更觀院裏畫
着的石鏤着的八十一化圖盡行除毀了者自宣諭已
後如有隱匿道家一切說謊捏合毀謗釋教偷竊佛語
窺圖財利誘說妻女此誑惑百姓符咒文字及道家
大小經文若所在官司不添氣力拘刷與隱蔽之人一

體要罪過者外民間諸子醫藥等書自有板本不在禁
限准此至元十八年十二月二十日

壬午十九年

八月賜文天祥死
時年四十七歲矣

甲申正月六日大赦

乙酉二十二年

十二月安童
丞相復職

聖旨焚毀諸路偽道藏經之碑翰林院臣唐方楊文郁王

構趙與李謙闔復李鑄李監王磐奉勅撰正奉大

夫樞密副使臣商挺奉勅書光祿大夫中書左丞

相監修國史臣耶律鑄奉勅篆額

欽定四庫全書

佛祖歷代通載
卷二十一

三

至元二十一年三月初三日詔遣資德大夫總制院使兼領功德使司事桑格諭翰林院戊午僧道持論及至元十八年十月二十日焚毀道藏偽經始末可書其事於石臣磐等謹按釋總統哈達薩哩所錄事迹昔在憲宗皇帝朝道家者流出一書曰老君化胡成佛經及八十一化圖鏤板傳布其言鄙陋誕妄意在輕蔑釋門而自重其教巖賓大師喇嘛總統少林長老福裕以其事奏聞時上居潛邸憲宗有旨令僧道二家同詣上所辯

析二家自約道勝則僧冠首而為道僧勝則道削髮而為僧僧問道曰汝書為諭化胡成佛且佛是何義道對曰佛者覺也覺天覺地覺陰覺陽覺仁覺義之謂也僧曰是殆不然所謂覺者自覺覺他覺行圓滿三覺圓明故號佛陀豈特覺天地陰陽仁義而已耶是時上特語近侍曰吾亦先知仁義是孔子之語謂佛為覺仁覺義其說非也道士又持史記諸書以進欲出多說傲倖取勝帝師班迪達帕克斯巴曰此是何書道曰前代帝王

欽定四庫全書

佛祖歷代通載
卷二十一

三

之書上曰汝今特論教法何用攀援前代帝王帝師曰
我天竺亦有此書汝聞之乎對曰未也帝師曰我為汝
說天竺頻婆羅王贊佛偈曰天上天下無如佛十方世
界亦無比世間所有我盡見一切無有如佛者當其說
是語時老子安在道者不能對帝師又問汝史記有化
胡之說否曰無又問老子所傳何經曰道德經曰此外
更有何經曰無道德經中有化胡事否曰無帝師曰史
記中既無道德經中又無其為偽妄明矣道者辭屈尚

書姚樞曰道者負矣上命如約行罰遣近臣托歡將道者樊志應等十有七人詣龍光寺削髮為僧焚偽經四十五部天下佛寺為道流所據者二百三十七區至是悉命歸之道教提點甘志泉所據吉祥院其一也據而弗歸至元十七年夏四月僧人復為徵理長春宮道流謀害僧錄廣淵聚徒持梃毆擊僧衆自焚廩舍誣廣淵遣僧人縱火且聲言焚米三千九百餘石他物稱是事達中書省辯其誣甘志泉王志真欵伏詔遣樞密副使

博囉及諸大臣覆按無異詞志泉志真就誅剗則流竄
凡十人仍徵所聲言米物如其數歸之僧衆有道家偽
經尚存為言者聞諸皇太子十八年九月都功德使司
托忒賽音齊奏臺往年所焚道家偽經板本化圖多隱
匿未毀其道藏諸書類皆詆毀釋教剽竊佛語宜皆甄
別於是上命樞密副使與前中書左丞文謙秘書監友
直釋教總統哈達薩哩太常卿呼圖克伊蘓中書省客省
使圖魯在京僧錄司教禪諸僧及臣等詣長春宮無極

殿偕正一天師張宗演全真掌教祁志誠大道掌教李
德和杜福春暨諸道流考證真偽翻閱兼旬雖卷帙數
千究其本末惟道德二篇為老子所著餘悉漢張道陵
後魏寇謙之唐吳筠杜光庭宋王欽若輩撰造演說鑿
空架虛罔有根據詆毀釋教以妄自尊崇復愛慕其言
而竊為己有假陰陽術數以示其奧哀諸子醫藥以誇
其博徃徃改易名號傳註訛舛失其本真又所載符呪
妄謂佩之令人商賈倍利子嗣蕃息伉儷諧和如駕鸞

之有偶將以媒淫亂而規財賄至有教人非望佩符在
臂則男為君相女為后妃入水不溺入火不焚刀劍不
能傷害之語其偽妄駁雜如此留之徒以誑惑愚俗自
道德經外宜悉焚去臣等同辭以聞上曰道家經文傳說
踵謬非一日矣若遽焚之其徒未必心服彼言水火不
能焚溺可姑以是端試之俟其不驗焚之未晚也遂命
樞密副使博囉守司徒哈喇哈遜等諭張宗演祈志誠
李德和杜福春等俾各推擇一人佩符入火自試其術

四人者奏言此皆誕妄之說臣等入火必為灰燼實不敢試但乞焚去道藏庶幾澡雪臣等上可其奏遂詔諭天下道家諸經可留道德二篇其餘文字及板本化圖一切焚毀隱匿者罪之民間刊布諸子醫藥等書不在禁限今後道家者流其一遵老子之法如嗜佛者削髮為僧不願為僧者聽其為民乃以十月壬子集百官於憫忠寺焚道藏偽經雜書遣使諸路俾遵行之臣磐等聞老氏之為道也以清淨為宗無為為本謙沖以處已

損抑以下人非有貪欲好勝之事厥後枝分派別徒屬寢盛襲訛成偽誇誕百出清淨一變而為污穢無為一變無所不為如漢之文成五利致身求仙恍惚誕幻帛書飯牛之詐黃金可成之妄一旦敗露為武帝所誅三張之徒以鬼惑眾倡亂天下為皇甫嵩曹魏所滅宋王浮昔居上清寶籙宮與女冠為姦林靈素自稱神霄紫府僊鄉襍大水不驗並為徽宗誅竄而死迨金末年復有麻被先生錢笠李二人以姦謀秘計出入時貴之

門肆為淫污之行咸受顯戮歷代以來若此之類不可
勝數追惟禍亂之源姦宄之本率皆假符籙以神其教
託偽經以警其俗橫肆巧誣倡為詭狀詆毀聖教冠攘
內典固已悖老氏不爭不盜之禁矣及陷刑辟皆是孽
自內作復將誰咎哉且夫釋氏之教宏闊勝大非他教
所擬倫歷百千世聖帝明王莫不尊崇東冒扶桑西極
昧谷冰天桂海山河大地昆虫草木胎卵濕化有情無
情百千萬類皆依佛蔭生息動止於天地之間故天上

天下惟佛為尊超出乎有生之表歸極乎無碍之真智
周三界神妙諸方澤及大千功用不宰其大有如此者
慈航所至無溺不援法雨所需有生皆潤憫世人之沉
淪幻海顛覆迷津展轉多生流連累劫將使之脫凡企
聖蠲弊崇真故神光破沉晦之門大覺指無生之路其
仁有如此何意狂謀輒形妬忌雖積毀銷骨衆煦漂山
法體圓成初無小玷譬如盲人之毀日月何傷日月之
明井蛙之小河海奚損河海之大多見其不知量也欽

惟聖天子識超四諦道慕三乘叅無象之真空傳法王
之心印所以尊崇之禮皈向之誠矯百偽以從真黜羣
邪而歸正有不容不嚴者焉况乎筆墨勸誨妖術誤世
恣為欺誑鼓蕩羣愚若不大為改革則邪說肆行狂道
惑衆其如天下後世何凡天下之理有善有惡有正有
邪有真有偽常混然而同處雜然而並行自非稟上聖
之資誕生知之性智出庶物明照羣情則紅紫之亂朱
注淫之變雅是孰得而辯明之哉由是言之聖天子匡

濟真圖翼扶大法之功至矣槩諸聖不可有加矣於以
鑿含靈之耳目開正途之荒穢使般若之光永乎無際
劫遍滿恒河沙界延洪聖壽於無疆衍繇儲君之福利
曷祚於億萬年之久者庸有既乎是可述也臣磐等敬
為之書以貽後人俾為老氏之學者有所警焉

大元至元辨偽錄隨函序翰林直學士奉訓大夫知制
誥同脩國史臣張伯淳撰天無私覆地無私載日月無
私照辨偽錄之所云良有以也洪惟聖朝繼天立極論

道經邦以佛心子育萬方以正法澤被四海至元辛卯
之歲孟春大雲峯長老邁吉祥欽奉皇帝明命撰述至
元辨偽錄奏對天顏睿覽頒行入藏流通原其所自乙
卯間道士丘處機李志常等毀西京天城夫子廟為文
城觀毀滅釋迦佛像白玉觀音舍利寶塔謀占梵剎四
百八十二所傳襲王浮偽語老子八十一化圖惑亂臣
佐時少林裕長老率師德詣闕陳奏先朝孟克皇帝玉
音宣諭登殿辨對化胡真偽聖躬臨朝親證李志常等

義墮辭屈奉旨焚偽經罷道為僧者十七人還佛寺三十
十七所黨占餘寺流弊益甚丁巳秋少林復奏續奉綸
旨偽經再焚僧復其業者二百三十七所由乙卯而辛
酉凡九春而其徒竄匿未悛邪說謠行屏處猶妄驚瀆
聖情由是至元十八年冬欽奉玉音頒降天下除道德
經外其餘說謊經文盡行燒毀道士愛佛經者為僧不
為僧者娶妻為民當是時也江南釋教都總統永福嘉
木楊喇勒智大弘聖化自至元二十二春至二十四春

凡三載恢復佛寺三十餘所如四聖觀者昔孤山寺也
道士胡提點等舍邪歸正罷道為僧者奚啻七八百人
挂冠於上永福帝師殿之梁拱間故典如南嶽山之券
為事偽者戒試嘗考之自大教西來漢明帝迎摩騰竺
法蘭二師於洛陽五嶽道士褚善信等上表譏毀佛法
當時築壇以佛道二經焚之道經悉為灰燼佛經放光
無損尊者踊身作十八變有狐非獅子類燈非日月明
之至言道士為僧者不可勝數如寇謙之矯妄崔浩惑

魏太武而崔浩卒以族誅曇謨最之挫屈姜斌斌流於
馬邑齊曇顯之愧陸修靜唐總章元年法明辨化胡之
偽勅搜聚天下化胡經抑嘗火其書矣由古而今歷代
帝王之制斯可忽諸蓋世尊等視三界衆生猶如一子
棄背大覺是子背其父也子背其父是自昧其所天也
且師老子者道德二篇以清虛澹泊絕世棄聖立其宗
隱居以求其志翛然無爲爾今盜名之徒叢嘯黨援假
立冠褐峻侈宮觀苟世利養宣老氏之用心哉况老氏

謂大辨若訥大巧若拙辨者不善善者不辨勿矜勿伐
抱一為天下式而占毀佛寺竊經扇化胡之偽是若拙
若訥歟是善者不辯歟師老子而違其術亦復違其自
宗矣若嫡師於老子者則弗為也過歸末流爾雖然麒
麟之於走獸鳳凰之於飛鳥蘭蕙之於薰蕕旃檀之於
穢壤則世未有舍鳳凰麒麟之瑞蘭蕙旃檀之馨而恆
走獸飛鳥之常薰蕕穢壤之垢者人心天理愛惡之所
同也奈何菽麥未析而甘事於偽妄不實之教復矜誕

其浮辭侮慢大覺訕毀至聖而弗憚三塗淪溺乎斯辨
偽錄之正名教造理淵奧排難精明凜乎抗凌雲之勁
操坦然履王道之正塗而隄備後世之溺於巨浸者其
為言也至矣蓋有偽則辯無偽則無辯豈好辯哉弘四
無碍之辯者邁公之德歟言之者無罪聞之者足以戒
故我皇金言喻辭曰譬如五指皆從掌出佛門如掌餘
皆如指信乎王言如絲其出如綸明逾日月堅逾金石
為萬世之龜鑑則斯錄豈小補哉

辯偽錄序蓋聞五運未形元無人物之號三才既立乃
叙尊卑之名肇分六爻始畫八卦而有書契定乎訓章
鳳篆龜圖金縢玉宇百家之異轍萬卷之分區雖理究
乎精微言殫乎物範紀情括性未出乎域中原始要終
詎該於化內況乎法身無相高超於象帝之先真諦絕
稱迴出乎思議之表英猷茂實代有人焉如意者俗姓
呼延氏太原人也世傳纓冕累葉播遷代郡因為家焉
九歲落紉隨師請業玉離荆岫價重之德彌彰桂生幽

岩馨香之風遠逝阿師內窮三藏之奧外覈九流之源
名冠於中華聲聞於朝野運談天之口施不世之才郁
郁間綺錦之文雄雄聳凌雲之氣班馬之珠玉未可同
年顧陸之文章寧堪並駕至若莊生墨生之學黃老李
老之書三清謗道之文十異九迷之錄混元隱月之秘
靈寶赤書之儀煥若宵膺明猶指掌加以禪叅於五派
傍閱於羣書既有雄才特專著述運思之外汲引無窮
挫邪則有吼石之功扶正則具鞭屍之德固以才侔安

遠學邁生融實覺海之龍鱗乃佛門之柱礎切見全真
道士者丘處機李志常史志經令狐璋等學業庸淺識
慮非長並為鄙辭排毀正法擊茲布鼓竊比雷門使中
下之流咸生邪見欽奉色辰聖明皇帝發大悲心愍其
盲瞽恐墮泥犁救令製斯論耳震蕩法海摧彼詞鋒碧
鷄之銳竟馳黃馬之駿爭鶩狀鴻爐之焚纖翼猶炎日
之煉輕冰負勝之儔於斯可見暫歸慈定已破魔軍至
元十八年十月二十日復欽奉先皇帝聖旨勅令天下

偽經一時焚盡由是佛日重暉於碧漢法雲廣布於閭
浮右如意所作文賦注解四經序韓文別傳性海賦等
在世已傳然茲論五卷二百餘紙窮釋老之淵源分邪
正之優劣蓋唱彌高而和彌寡深可媿焉余文慚綺麗
學匪通圓覩斯論之嘉言欽吾皇之鴻護不勝手舞勉
為斯引輒以藤綆聯彼珪璋庶博雅君子詳其致云爾
大雲峯住持襲祖沙門雪谿野老貴吉祥述

大都道者山雲峯禪寺住持如意祥邁長老奉勅撰辯

偽錄五卷其畧云妄立天尊偽

化云道者萬化之父母自然之極尊於此幽玄

微妙之中而生空洞空洞者真一也真一之氣化生之後歷九十九萬億九十九萬歲乃化生上三氣三氣相去九十九萬億九十九萬歲三合成德共生無上乃虛皇天尊又歷如上歲數乃生中三氣三合成德乃生玄老即元始天尊也又歷如上歲數乃生下三氣三合成德共生太上即太上道君也自後又一氣復生三氣每氣相去八十一萬億八十一萬歲三合成德共生李老君雖四聖相次各不相因謂之獨化老君生後乃生五運謂太易太初太始太素太極等老君混沌之祖宗天地之父母故能分布清濁開闢乾坤 辨曰蓋

聞龍圖鳥篆之文龜書科斗之典玉版玉諫之記金滕

金匱之書秦漢魏晉之章宋齊梁陳之簡記事記史直

筆直言靡覩虛皇之名不聞元始之號安有手執玉圭
身掛黃褐頂垂皓髮頭戴金冠別號天尊高拱三清之
上獨稱教主統御九華之宮縱有天尊之名並是偷竊
佛語古經稱佛名為天尊不關道君之事竊他美稱妄
自尊嚴取信通人斯言謬矣案列子及易鉤命訣皆云
天地未生之前有太易有太初有太始有太素有太極
說者咸云太易者未見氣也太初者氣之始也太始者
形之始也太素者質之始也太極者質形已具混沌未

分也太極之後乃生兩儀謂之天地夫名從實生實從
名起名實既著其道乃行太易之前杳然空洞冥冥漠
漠本絕音容何得謬張九氣妄生四人虛上生虛似敲
空而求嚮偽中起偽如趁影之尋蹤豈不思既立其名
須有其體既立其體須有氏族且道虛皇元始誰人所
生氏族何起居在何處若有源系出在何書若無來由
即是虛設又空洞之前本無歲數今標歲數愈見虛張
蓋數目起於伏羲甲子唱乎黃帝將今記古顛倒何多

且上之三尊為有形耶為無形耶若是有形不在太易之上爰從父母而生須有年代時處姓氏名字前云三氣共德而生則是以氣生氣與氣不殊何有形名若是無形本無名位下第七化乃云老君以上皇元年九月二日出遊西河遇元始天尊乘八景玉輿駕九色玄龍羣仙導從手把華旛師子白鶴嘯歌邕邕同會西河之上授老君洞玄玉符此是誰耶進退兩求並無準的則知海棗虛談有名無實彫冰鏤雪枉廢詞章山海之所

不收大荒之所不載庸愚巧飾何足信哉老君衰周之
柱史誑云混沌之祖宗避周亂而過函關妄云天地之
父母既自語之相戾何函矢之相攻掩耳偷鈴欲隱彌
露道德章云吾有三寶寶而持之一曰慈二曰儉三曰
不敢為天下先老君獻胡王妻子與胡兵格戰何有慈
乎乘玉衡之輿坐金闕之內披九色離羅之衣廕九光偃
鶴之蓋何有儉乎生於無始起於無因為萬道之先作
元氣之祖觀混沌之未判視清濁之未分為帝王之師

作天地之母何有不敢為天下先乎遼陽高憲字仲常
遊東京白鶴觀見三清像指其右曰此何像也觀主對
曰老君像曰何代人曰周定王時又指左曰此何像也
主曰道君像曰此何代人住倉惶未答憲指中尊曰且
饒這元始天尊聞者傳以為笑

創立劫運年號偽

第三化云始則太虛之氣其氣相擊往來亂射經百億萬氣之後其氣方

慢往來流行為自然之氣此偷佛書世界初成風輪下旋之事也又號彌羅萬梵之氣不經九萬九千九百九十九億氣之後結吉祥之氣成一聖人自號元始天王同時生五老五行之主其先號延康年號龍漢又經如

上氣數乃生道君時劫號赤明年亦號赤明同時生九
老分爲九天又經如上氣數方生老君劫號清運年號
上皇時生八公又立五運大易太初等老君乃以
陰陽二氣結爲混沌而分布天地萬物始備矣

辨曰蓋聞班固律歷之志史記天官之書皇甫謐之帝年陶
隱居之帝紀未聞五運之前先有年號三氣之內虛立
劫名既清濁之未形只是洪濛一氣何有老君元始五
老九天雖竊佛主劫之名而不曉成壞之數梵云劫波
此云時令時雖長短皆立劫名錯謬梵言迷惑體相釋
教未來此劫但有劫殺劫賊故許慎說文云以兵憎人

曰劫又魯將曹沫劫桓公於壇上求所侵地此則逼奪
名劫豈有劫運之言乎今陳此言妄竊見矣夫名位既
有年號斯張將以率領萬方整齊四海混同九有同一
車書天子至尊得建年號無名位者不敢立焉孔子雖
然刪書定禮分辨君臣以無貴位止號素王矧乎老聃
周之柱史臣子之列而草竊帝王妄建年號哉况軒皇
之前本無甲子黃帝臣大
桡造甲子漢武之代始建年號武帝始
立年號
將古標古亦何偽乎或曰老子生於天地之前別立年

號有何乖違答曰既在天地之上乃是太易之前世界
未形君臣無跡杳然空寂唯一溟濛建立年號統領誰
人乎明知偷佛莊嚴賢劫星宿之意而立此延康赤明
青運之目彼明三世比約一時正同山卷偷王衣物迷
惑顛倒上下失次爾下云老子生於天岡李谷字曰光
明則在三皇之後何得老君以陰陽二氣結為混沌而
分布天地耶首尾兩端穿鑿見矣

開分三界偽

第五化云天地有形之大者太上老君乃混沌之祖宗天地之父母故能分布清濁

欽定四庫全書

卷二十一

開闢天地運玄元始三氣而成天上為三清三境即始
氣為玉清境元氣為上清境玄氣為太清境又以三清
之氣各生三氣合成九氣而為九天第一鬱單天第二
上神壽無量壽天第三梵藍須延天第四寂然兜率天
第五波羅尼蜜不橋樂天第六洞玄化應聲天第七靈
化梵輔天第八高虛清明天第九無想無愛天比之九
天各生三炁每氣為一天合二十七天通此九天為三
十六天則三界四民上極三清是其數也初下六天為
欲界一太黃天二太明天三清明天四玄胎天五元明
天六曜天次一十八天為色界一虛無天二太極天
三赤明天四紫華天五曜明天六皇笏天七靈明天八
端靖天九光明天十極瑤天十一元載天十二太安天
十三極風天十四始皇天十五大黃天十六無思天十
七既樂天十八曇誓天次四天為無色界一霄度天二
元同天三妙成天四禁上天比二十八天名為三界此
上又四天名為種人天一常融天二玉隆天三梵度天

四質奕天此四天超出三界又云上三天為三清境一曰太赤天二曰太清天三曰太微天最上曰大羅天包羅諸天極高無二玄都玉京鎮於其上三尊所處焉又太霄隱書云大道君治在五十五重無極大羅天中玉京之十七寶玄臺金牀玉几金童玉女之所侍衛住居在三十二天三界之外

辨曰詳夫地軀

伏儀

牛首

炎帝

之書龍師

太皞

鳳紀

少皞

之典談

天

鄒衍

論天

黃緯

之誥括地

地志

輿地

地圖

之圖甘氏星經張衡

靈憲不說三清之號匪聞大羅之名並是依傍佛經改

頭換尾採他名相粧綴已書且道教之宗源起黃帝而

老子涓子列子莊周鶡冠尹文派為道教諸子所談並

無說天之事惟是張道陵所集靈寶經中始說三十二
天効佛神呪而作蜜言自後道書牙相鼓唱空枝引蔓
唯誑下俗佛教未來云何不說釋經廣布始唱斯名明
為修靜增加三張妄闡狗偷鼠盜何足貴乎爾雅之立
四號約於四時太玄之說九天準於九有不似道家虛
加數目天本定體何有少多今各說不同顯知妄立紫
佛經三界三業所感總二十八欲界有六色界十八無
色有四具勝妙欲名為欲界形色超絕名為色界根識

兩忘名無色界越此而去名出生死捨分段之後身絕
形名而無寄安有玄都之境玉京之山金童玉女交雜
之事瓊輿碧帳之飾妄竊不真於斯見矣試問道士三
界從何而來何功所感釋名辨相全不能知且道宗極
致惟盡升天靈寶幽微祗貪羽化難逃四相詎免五衰
汎業浪以漂沉隨生死而輪轉縱茫茫之業識積浩浩
之苦源長往不歸良可歎息鬱頭藍弗是其驗歟

隨代為帝王師偽

第十一化云老君在伏犧時號鬱花子說元陽經教伏犧叙人倫畫八卦

在祝融時號廣壽子說按摩通精經教以鑽木出火陶
冶為器在神農時號大成子說太一元精經教以播種
五穀採和諸藥在黃帝時號廣成子教以抱神守靜之
道在少昊時號隨應子說在敬經教以鳥官為理分布
九屬以統百司在顓頊時號赤精子說微言帝嚳時號
錄圖子說黃庭經帝堯時號務成子說宣化經帝舜時
號尹壽子說通玄經七十卷又說道德經八千二百卷夏
禹時號真行子說元始經六十卷殷湯時號錫則子說
長生經二十卷周文王時號靈邑子說赤精經教以仁
孝之道乃至云上古之君皆受教於老子然後造作羣
物也

辨曰夫賢之與聖名位不同古哲今人出處各異莊周
云萬世之後一遇大聖猶旦暮遇之此明聖人出世表

瑞協祥應千年之期膺適時之運孤標特秀迴出常流
故得帝王師之諸侯禮重萬載一遇尚為旦暮豈有隨
代而出現乎夫李耳者退靜之士史記稱為隱君子也
避亂過關葬於槐里潛身柱下本是人臣位不躡於上
階名未廁於臺輔何乃擢君聖地為帝王師諡諡不經
駭人耳目培塿要齊於嵩華孰肯憑焉潢沔擬廣於滄
溟終難信矣豈有開闢之後萬億餘年中間別無一人
拔萃唯有老子為帝王師乎三墳五典八索九丘孔子

春秋丘明國語百家異說九流雜談並無老子為師之語唯是後代無知道士妄撰斯言欲使老子獨高羣聖美則美矣偽且偽焉且伏犧神農皆有聖德軒皇堯舜並號明君或幼而能言或生知妙道詎假老子教之然後造作羣物乎况書傳所紀古史所明燧人鑽火伏犧畫卦炎帝播耨女媧造簧黃帝作宮室軒冕樂有咸池顓頊作六英堯有大章舜有大韶及作圉荅禹有大夏湯有大濩文王有辟雍武王有下武繇作城郭蚩尤作

兵器岐伯造醫俞跗作脉經伶倫制律隸首作算容成作
歷大撓造甲子奚仲作車曹胡作衣伯余作裳於則作
履共鼓作舟楫巨揮作弓夷牟作矢黃雍父作杵臼孟
莊子作鋸趙武靈王作靴蘇威公作箎暴辛作塤后稷
之孫叔均作犂蒙恬作筆蔡倫作帋夏昆吾氏作瓦此
皆各有其主羣書所明何得自矜覽為我造又周易繫
辭孔子所述列明古帝製造之事如云包犧氏之王天
下也觀像於天俯察於地近取諸身遠取諸物始畫八

卦以通神明之德以類萬物之情作結繩而為網罟以
畋以漁蓋取諸離神農氏為耜為耒以利天下日中為
市交易有無乃至黃帝堯舜垂衣裳而天下治蓋取諸
乾坤如此歷陳法易造物不言老子所造也竊功業標
為己能銜名自高君子不忍又言老子在堯時為務成
子者案後漢應劭風俗通云東方朔是太白星精黃帝
時為風后堯時為務成子周時為老聃在越時為范蠡
在齊為鸛子此則務成子乃東方朔非干老子明矣何

得妄加鈎引稱老子為人師乎案魯哀公問於子夏
曰五帝三皇皆有師乎子夏曰有臣聞黃帝學乎太真
顓頊學乎綠圖帝嚳學乎赤松子堯學乎尹壽舜學乎
務成跗禹學乎西王國湯學乎威子伯文王學乎鉸時
子斯武王學乎郭政周公學乎太公呂望上之所叙文
極分明而言老子隨代為帝王師何出言之狂悖哉巧
言如簧顏之厚矣且老子哀周柱史史有明文本是人
臣返為上古帝王之師履冠戴屨何顛狂之甚乎又上

文云上古之君皆受教於老子則桀紂之不德幽厲之無道秦皇之凶暴王莽之篡逆亦老子之所教也既然如是則老子為悖逆之魁首巨猾之元兇不忠不孝老子之所生不義不仁老子之所主為人師者不亦慚乎老君既說隨代為師而秦漢之下至於金朝偏無一現乎今既無矣古亦虛焉且漢文恭儉孝武英明孝明達禮樂之情孝章優儒雅之道魏文帝風流文藻晉世祖明達寬仁宋文帝致治昇平梁武帝文武兼備隋高祖

混同四海唐太宗混一車書此時不俟老子之化而皆
金聲玉振則知牽合巧會枉廢詞章祇可誑於閭閻難
可信於達士嫫母加粉見者愈嗤隣女效顰鄉人不貴

老子出靈寶三洞偽

第九化云太上老君以中皇九年三月一日於玉清天金闕上官撰

集靈篇以為寶經三百卷符圖七千章玉訣九千篇老
君於上三皇時出為萬天法師又號玄中法師當龍漢
元年授上三皇洞真經一十二部以無極之道下教人
間其時人壽九萬歲於中三皇時號有古先生當赤明
元年授中三皇洞玄經一十二部行無上正真之道以
化於人其時人壽六萬歲於下三皇時出為師號金闕
帝君當開皇元年授下三皇洞神經一十二部以太平
之道化人其時人壽一萬八千歲夫洞真洞玄洞神名

一十二部合為三
十六部尊經也

辨曰夫仲尼入夢十翼之道始宣伯陽過關二篇之教
方闡有名為萬物之始無名為天地之先混微妙而同
玄驚寵辱而一致谷神不死久視長生挫銳解紛謙卑
自牧此老氏之旨也自餘教典皆是偽書制雜凡沅惟
尚誇競採傍佛語換體安名擬三界而立三清倣三大
而立三洞虛勞紙墨妄飾詞章何以知之漢時張道陵
造靈寶經王褒造洞玄經吳時葛孝先造上清經晉時

王浮造明威化胡經鮑靜造三皇經後改為三清經齊
朝陳顯明造六十四真步虛經梁時陶弘景造太清經
隋末輔惠祥改涅槃為長安經後事發被誅案甄鸞笑
道論云道家妄注諸子三百五十卷為道經如此詳之
代代穿鑿人人妄制採他佛教標為道書或言仙洞飛
來或言老子再現羣賢不覩道士獨傳欺調時君不懼
朝憲故唐琳法師對太宗皇帝云若據肅溫衆議道家
止有道德二篇如依漢明校量便應七百餘卷約葛洪

神仙之說僅有一千准脩靜所上目中過前九十又檢
玄都目錄轉復彌多既其先後不同顯知後人妄制增
加卷軸添足篇章依傍佛經改頭換尾或道名山自出
時唱仙洞飛來何乃黃領獨知英賢罕覩典籍不記書
史無聞試問當今道士推勘後出之經為是老子別陳
為是天尊更說若也更說應有時方師資傳授為是何
年何月何邦何代若在天上面說何人傳來若在西域
而談何人譯出如其有據容可流行若也妄言理湏焚

剪又漢晉之代僧號道士寇謙得志僭冒其名今稱法師愈為矯飾法師之號源出佛經萬卷百家本無此語且為法之師名為法師法即是師名為法師名義不知妄安已號按賢劫已來有三佛出初佛出時人壽六萬歲第二佛出時人壽四萬第三佛出人壽二萬何乃改彼三皇安合其數又前說云上三氣中而有龍漢赤明之號是時五運尚無但惟一氣何有三皇之君人壽之數乎上古縱有五龍四姓九頭十紀亦無三皇建立年

號試問龍漢赤明上皇開皇誰君之年乎若言有說史
無明文若言無憑不可妄立扣其兩端竟無一是又伏
羲之前文字未有何出三洞靈寶之篇乎又十二部名
源出佛經一代時教類分十二道家名義不知何以妄
著已典如琰美玉擬作甌窰雖受勛勞智者見誚

遊化九天偽

第二十六化云是時老君於青羊大會引尹喜冉冉升空初至第一天見波利天帝

乘九光元靈之輿陰七元交晨之蓋建五色攝魔之節金童玉女九萬人退老君八大有宮請問自然之道

如是摩夷天楚寶天化應天不橋樂天兜率天須延天禪善天爵單天隨處天帝皆與天童玉女迎禮老君請

問法要所到天堂皆設瓊漿碧醴
丹液流薰蘭羞八澈靈芝珍果

辨曰昔我世尊初成正覺不離道樹而赴諸天一身不
分而遍一切即多而一即一而多猶如素月流空影分
衆水大塊噫氣萬竅怒號大小咸周遠近無隔無心頓
應豈止九天伯陽周之柱史尹喜函谷關吏身居下位
難等聖蹤欲為己德蓋善竊者鬼神不覺既為人知非
是好手離欲而獲輕舉禪定而感神通老子既無此功
何以升於天上昔列子居鄭夫妻相忘耳目不分儵然

絕寄心凝形釋骨肉都融後身如槁葉隨風東西萬里

須臾過旬乃返而莊周譏云猶有所待矧乎老耳不絕

妻子

老子之子名宗宗之子名注注之子名官侍魏文侯

未逮形亡過關乘薄輦

之車道經垂有身之患詎可升天履霧駕鶴乘雲擬効

牟尼矜為已勝且布施而獲大福持戒而感生天汝尚

不達斯由安能為天說法欲界本六妄云九天初禪純

男而云玉女勾虛闡偽巧說多端且初禪已上禪悅為

食定生喜樂捨念清淨何用瓊漿碧醴蘭羞八徹乎將

謂天上同於人間羹酒肉之薰羶爭魚臭之穢濁喻乎
鵠耽死鼠便為鳳凰同食盜聽不真請杜臆說窮鄉多
怪曲學多辨斯言信乎

偷佛經教偽

第三十化云胡王見太上徒衆甚多疑見鬼魅遂積薪焚之火起衝天老君放身光

明火中為王說金光明經胡王益怒納之大鑊煮之三
日老君鑊湯之中蓮華涌出坐蓮花上說涅槃經又云
老君使尹喜為佛與胡王為師懺悔三業六
根五逆十惡乃說五戒十善并四十二章經

辨曰夫麒麟闕而日月虧鯨鯢死而彗星現銅山崩而
洛鐘應葭灰缺而月暈殘蓋感應之道交故機教之相

扣人心渴仰法雨芳菲沃彼情塵開他蒙昧故孔子曰
不憤不啓不悱不發此明待問而說也況乎聖人設教
權變多方宣使他人起怒自受焚溺全無悞懣強與他
言豈知虛往實歸之道哉刻刻字樣巧合經名既坐火
焰上說金光明經坐蓮華上說蓮花經則道德二篇坐
於道路而說洞玄三部元在水洞而談此既不然彼云
何爾且金光明性相通顯法華經破權歸實涅槃經明
佛性真常四十二章羣經集出不窮根蒂盜聽妄談惟

口起羞出何容易難惑上智只誑下愚又上經既是老子所陳道士應宜依而學佛何乃含氣為道專諷靈寶試問三經文明何義道藏既不收攝道士又不通明偷大聖之至誼為老君之極唱正符涅槃盜牛之喻又同瞽者悞入金穴雖得其寶未知何用又曰懺悔三業至年月齋法若如是者道士應通且問懺悔是何語言今此懺悔為事懺耶為理懺耶約功德門而滅罪邪約逆生死心而滅罪耶能懺之心宜有幾種所懺之罪何處

安排懺悔二字由尚罕知則三業六根五逆十惡戒善之軌年月齋名決不曉達若是老子所說道士應合備知既然一字不通顯知偷佛妄說此同竊賊人物被主認著猶不招承更生拒辨焚經火板方乃慚惶君子悔前不至如此

老君結氣成字偽

第八化云聖紀經云太上老君昔於龍漢之年從元始天尊於中央大福


堂國說靈寶十部妙經出法度人又於東極大浮黎國出法度人以紫筆書於空青之林又於南極禪離界以火煉真文瑩發字形又於西極衛羅世界北極鬱單國皆出法度人老君以五方真氣之精結成寶字大方一

大八角垂芒為雲篆之形飛鳥之狀以立文章又云墳典自我而出經籍自我而生也

辨曰夫文字之聿興爰從上古伏羲氏之王天下也始畫八卦造書契以代結繩之政由是文籍生焉故有青丘紫府三皇刻石之文綠檢黃繩六甲靈蜚之字後有蒼頡因而增制大篆起於史籀小篆興於李斯飛白創於蔡邕隸書變於程邈秦書八體漢字六形瘦金堆金垂雲垂露蔡葉龍爪顏體坡書皆循古以增成近代而改制豈假真氣而結何關老子傳來掩竊他能銜賣已

德放舒白眼不恥清流上云龍漢起於初氣何有老子
而生既言紫筆書林乃在蒙恬之後牽今引古欺我賢
人孔安國云伏犧神農黃帝之書謂之三墳言大道也
少昊顓頊高辛唐虞之書謂之五典言常道也易則三
聖方定詩則羣英之言春秋孔子所修禮則周公所定
爾雅周公所纂國語丘明所述劉熙釋名許慎說字埤
蒼廣雅桂苑珠叢顧野王之玉篇陸法言之切韻各有
源系非干老聃而言墳典自我而出經籍自我而生荒

吾謬談侮弄明哲亦猶相如上林說盧橘夏熟揚雄甘
泉賦玉樹冬蒨聽其言則洋洋美耳究其事則杳杳空
傳矧乎國名虛設妄採他書大福堂改大堂而取名東
浮黎彷彿桑而立號南禪黎革重黎而標字西衛羅竊
於迦維羅衛北方全收鬱單越名十洲所不收神異所
不攝地理無所紀括地絕形名空闡五車了無一實偷
鈴掩耳斯之謂與



佛祖歷代通載卷二十一